

# Illissakkut kræfti





## Imarisai:

- 5 Aallaqqqaasiut
- 6 Illissakkut kræfteqarnermut suut  
malunnaataasarpat
- 6 Misissuinerit suut ingerlanneqassappat?
- 7 Illissap ameraasaaniit piigaqarluni misissuineq
- 7 Misissuinerit allat
- 9 Qanoq napparsimatigaanga?
- 9 Nappaatikinnerusut gruppianiinnej
- 9 Nappaateqarnerusut gruppianiinnej
- 10 Suna katsorsaataava?
- 10 Pilatsinneq
- 11 Pilatsinnerup kingunipilui
- 11 Pilatsereernerup kingorna katsorsartinnej
- 12 Qinngortaaneq
- 12 Qinngortaanerit pilatsinnertaqanngitsut
- 13 Qinngortartinnerup kingunipilui
- 14 Nappaat siaruaassimappat qanoq pisoqassava?
- 14 Hormininik nakorsarneqarneq
- 14 Hormoninik nakorsasiinermi kingunipiluit
- 15 Kemoterapii
- 15 Kemoterapiip kingunipilui
- 15 Napparsimasunik sullisisut ilinnut katsorsaasut  
oqaloqatigikkit
- 16 Allatigut katsorsaatissaqarpa?
- 16 Misileraataasumik katsorsaaneq



- 17 Periaatsit ilisimatusarnikkut  
akuerisaanngitsut atorlugit katsorsaaneq
- 18 Katsorsartinneq naammassippat  
qanoq pisoqassava?
- 18 Misissortinneq
- 19 Nappaatip nangeqqinnissaanut ersissuteqarneq
- 19 Peqqisseqqissaanga?
- 20 Naatsorsueqqissaarnerit qanoq takussutissaqarpat?
- 20 Kræfti peerneqarsinnaanngippat taava?
- 21 Anniaateqartitsinaveersaarluni nakorsaasiineq
- 21 Nanginnermi katsorsartinneq
- 22 Atoqatigiinnikkummi inuunera taava qanoq?
- 22 Atoqatigiinnissamut kajumissuseqannginnej
- 23 Sooq illissakkut kræfteqalersoqartarpa?
- 23 Pualasuujuuneq
- 24 Uanga nammineq qanoq iliuuseqarsinnaavunga?
- 24 Nerisat timikkullu iliuuseqarsinnaaneq
- 25 Pujortartarpit?
- 26 Pujortarunnaarnissamut ikiorneqarusuppit?
- 26 Aalakoornartutorpallaarpit?
- 27 Aalakoornartutornerup allanngortinnissaanut  
ikiorneqarusuppit?
- 29 Sumi ikiorneqarsinnaavunga imaluunniit  
siunnersorneqarsinnaavunga?

## Illiaq pillugu paasissutissat

Illiaq tassaavoq ilumiittooq erlaviit ilaannut atasoq, naatitatut peeritut naqisimasutut atsigaaq. Illissap iigaa issusuunik nukinnik imaqarpoq iluanilu ippoq isugutsersaataa amertut ittoq. Arnani naartusinnaasuni illissap ilua qaammammut ataaserarluni allisuusisarpoq, tamanna pissuteqarpoq arnat hormonii østrogen aamma progesteron sunner-neqartarmata. Arnaq naartutinnagu illissap iluaniit masak aattalik aniasarpoq - tamanna aaqartarnevuq.

Aaqassaarnermi illiaq nalinginnaasumikannikillisarpoq masaliuutaalu saalisarluni.



## Aallaqqaasiut

Inuit amerlanersaat kræfteqarnertik paasigaangamikku annilaaru-jussuartarput. Qisuarinerit assigiinngittaqaat.

Amerlasuut annilaangasorujussuanngortarput toqunissartillu eqqarsaatigeqqajaalersarlugu. Inuit ilai soriusissaarutivittarput, suullu tamaasa artornartutut upperiuminaatsutullu isigilersarlugit. Allat nappaatertik katsorsartinnissartilu qanoq iliuuseqarfinginiassallugu pilersaarusiorfigilertarpaat.

Illissakkut kræfteqarneq imaannaanngitsuuvoq, taamaattoq kræfteqarnernut allanut sanilliullugu arnat illissamikkut kræfteqartut siunissarissaarnerupput, amerlanersaat peqqisisaramik.

Una atuagassiannguaq apeqqutinut nappaammut katsorsarneqarnissamullu tunngasunik akissutissanik imaqarpoq.

Illissakkut kræfteqartut tamarmik immikkut assigiinngeqisunik atuga-qartarput. Taamaattumik nakorsaq aamma peqqissaasoq ilinnik katsorsaasussat, illit nappaatinnut tunngasunik apeqqutigisassannut akissutissaqarluarnerussapput.

Septemberi 2008

## Illissakkut kræfteqarnermut suut malunnaataasarpat

Aaqarfissap avataatigut aaqarneq illissakkut kræfteqarnermut ilisarnaataavoq nalinginnaanerpaaq. Imatullu pisinnaalluni:

- Aaqarfissarinngisap avataatigut piffissami allami aaqarnerit
- Aaqartarunnaarneerfikkut aaqarnerit/aanaalaarnerit
- Aattalimmik aniasornerit

Taakkua atoraanni imaanngilaq pinngitsoorani illissakkut kræftimik peqartoqarnissaa. Taamaattoq aaqarnerit nalinginnaanngitsuuusut atoraanni taava piaartumik nakorsiartarnissaq pingaaruteqarpooq. Illissakkut kræfteqarneq nalinginnaasumik ilukkut misissortinnermi imaluunniit bakterissat nalinginnaasumik misisorneqarnerini paasineqarsinnaanngilaq. Illissap paavatigut kræfteqarnermut sanilli- ullugu illissakkut kræfteqarneq allarluinnaavoq.

## Misissuinerit suut ingerlanneqassappat?

Nakorsap nakorsiarfivit pasitsaappagu, illissakkut kræfteqarsinnaunerit, taava arnat nakorsaannut, gynækolog-imut imaluunniit napparsimmavinni arnat ilui pillugit immikkoortortaqarfinnut inner-suunneqassaatit annertunerusumik misisorneqarnissat siunertaralugu.

Nalinginnaasumik ilukkut misissortinnissat siullersaatillugu ingerlanneqassaaq. Arnat nakorsaata pingaartumik maluginiassavaa illiaq nalinginnaasumik angissuseqarnersoq kiisalu illissap avataani kræftiusinnaasumik takussutissartaqarnersoq. Tamatuma saniatigut nipip maligaasai atorlugit assiliinermi ersersinniarneqassaaq tinuneqarnersoq taamaattoqassappallu tinuneq qanoq atsiginersoq.

Illissap ameraasaaniit nakorsaq ilanngarsissaaq misissugassamik.

## Illissap ameraasaaniit piigaqarluni misissuineq


Illissap ameraasaaniit piigaqarnikkut taamatuttaarlu misissuinikkut ersarissumik paasineqarsinnaavoq illisakkut kræfti atugaanersoq.

Taamaattumik misissugassamik piigaqartoqassaaq (biopsi).

Tamanna pisarpoq ilummuit torlulimmik milluaasinnaasumik illissamut mangussilluni. Taamatut misissortinnermi napparsimmaavimmut unittariaqanngilaq. Nalinginnaavoq misissugassap peereerneqarneraniit sapaatip akunnera ataaseq qaangiuppat akissuteqartoqassasoq. Alla periuseq misissugassamik piigaqarniarluni tassaavoq "kiliortuineq". Taamatulli misissuineq atorneqarunnaaluttuinnarpoq taamaaliornikkut unitsitaanissaq sinitstaanissarlu pisariaqartarmata.

### Misissuinerit allat

Nappaatip puannut ingerlaarsimasinnaanera pillugu sakissakkut assilisinneq aamma nalinginnaavoq. Nakorsaniit pasitsaanneqarpat nappaat siaruassimasoq taava misissuinerit ilasinnaapput. Tamanna nipip maligaasai atorlugit tarrarsuinerusinnaavoq (ultralydsscanning) imaluunniit CT-scanning atorlugit naakkut kuutsikkullu kræfteqartoqarnersoq imaluunniit tartukkut inalussakkullu ippinnartoqarnersoq misissorniarlugu tarrarsuisoqassaaq.



Illissap ameraasaaniit piigaqarluni misissuineq



## Qanoq napparsimatigaanga?

Peqqisseqqissinnaanerit qanoq ilimanaateqartiginersoq paasiniarlugu kiisalu katsorsaaneq qanoq ittoq atussanerit paasiniarlugu nakorsat qulaarniassavaat illit nappaativit qanoq killiffeqarnera.

Amerlanerpaatigulli nappaatip killiffiata paasilluarneqarnissa pisarpooq pilatsereernerup kingorna.

Illissap paavatigut kræfteqartut marlunnut immikkoortiterneqartput, (Gruppe) siulleq taaneqarsinnaavoq kræfteqarfip navianareruneratut aappaalu navianaanneruneratut.

Taakkua arlaat ilinnut atuuttuunersoq pillugu apeqquaasut arla-liupput tassaasut:

- Allisitsiutikkut takuneqarsinnaavoq kræftip sananeqatai qanoq navianassuseqarnersut imaluunnit qanoq sakkortussuseqarnersut. Navianarneri sakkortussusiilu pingasunut inissitsiterneqartarpot grad-imik taasamik. Grad 3-mi inissisimasut tassaaapput kræftip uumasuarai navianarnerit aamma sakkortunerit.
- Illissap iigaaniittup tinunerup qanoq ititigisumik inissisimanera.
- Nappaatip illissap paavanut siaruaassimanera imaluunniit illissap silataanut siaruaassimanera.

### Nappaatikinnerusut gruppianiinneq

Nappaatikinnerusut gruppianut (2) inissinneqarsimasut tassaapput kræfteqartut killiffimmikkut (grad) 1-mi aamma 2-mi inissisimasut, tassani apeqquaatinneqanngilaq illissap iigaaniittup tinunerup qanoq ititigisumut inissisimanera. Tassunga inissinneqarsimasut aamma grad-it pingajuat atorsinnaavaat, tamanna imaappoq illissap iigaaniittup tinunerup illissamut manngusimanera affaannaasoq, tassa kræfteqarfik illissap avataanut siaruaassimanngilaq.

### Nappaateqarnerusut gruppianiinneq

Nappaateqarnerusut gruppianut (1) inissinneqarsimasut tassaapput 3. Gradimik atuisut. Imaappoq tinunerup affaa imaluunniit affaanerusoq illissap iigaanut inissisimavoq. Gruppemut tessunga inissinneqarsimasut kræfteqarfiat illissap paavanut imaluunniit avataanut siaruaassimasarloq.

## Suna katsorsaataava?

Illissakkut kræfti pilaanikkut katsorsarneqartarpooq. Aatsaat pilaanik-  
kut misissorneqarsinnaavoq nappaat qanoq pinartuitiginersoq.

Napparsimasut ilaat ikittunnguit pilatsinnissartik sapertarpaat, utoq-  
qaassusiat, oqimaassusiat imaluunniit allatut nappaateqarnerat  
pissutaalluni pilaaneq ajornartarpooq.

Pilaanermut taarsiullugu taakkua qinngortarneqarnissamik neqe-  
roorfigineqartarpooq. Illissakkut kræfti siaruaassimappat nakorsaasi-  
neq atorlugu katsorsarneqarnissaq neqeroorutaasarpooq, tamanna  
kingusinnerusukkut atuarneqarsinnaavoq.

### Pilatsinneaq


Pilaanikkut illiaq tamaat, mannissaqarfit aqquataat aamma mannis-  
saqarfit peerneqartarpooq. Tamanna ilutigalugu aamma misissorne-  
qartarpooq illissap avataanut, soorlu qinersinut siaruaattoqarsimane-  
ranik takussutissaqarnersoq.

Taamaattoqarsimappat misissugassamik ilanggarsisoqassaaq.

Ilaannikkut qinersit illissamut qanittumiittut aamma peerneqartar-  
put.

Pilaaneq nalunaaquttag akunneranik ataatsimik marlunnilluunniit  
sivisussuseqartarpooq naanilu ammagaq appasissuutinniarneqartar-  
poq.

Ullut 4-miit 6-mut amerlassusillit uninngaviusarput.



## Pilatsinnerup kingunipilui

Pilatsinnerup kingunipilua nalinginnaanerpaasoq tassaavoq pilatsereernerup kingorna piffissaq siulleq naakkut anniartarneq.

Tamanna anniarnaveersaatitornikkut oqilisaavginiarneqartarpooq.

Ilaatigut quup aqqutaatigut aseruuttoortoqarsinnaasarloq, puakkut nuffersoortoqarsinnaasarloq kiisalu ikkkut aseruuttoortoqarsinnaasarloq. Arnat ilaat ingimik qulaatigut mersorneqarfikkut tilluusersinnaasarput. Amerlasuutigut tamanna ikiorserneqannigikaluarluni qaangerneqartarpooq. Aseruuttooruit antibiotika-mik na-korsaaserneqassaatit.

Illiaarsinnginninni aaqtarsimaguit pilatsereernerpit kingorna hormonimik Østrogeniliornerit kipitinneqassaaq tamaalillutillu aaqsasaarlutit. Tamanna siullertut isumaqarloq meeqqisinnaajunnaarninnik. Kiisalu pilatsinnerpit kingorna ullualunnguit qaangiunnerini aamma kiakkernertut aallerujussuartalernerit sakkortuut atuler-sinnaavatit.

Kingunipiluit allat ataavartunngorsinnaasut tassaapput utsuukkut panernerit kiisalu atoqatigiinnissamut kajumissuseerunneq. Piffissalli ingerlanerani atoqatigiinnissamut kajumittoqaqqilertoqarsinnaavoq.

Tamanna kingusinnerusukkut sukumiinerusumik allaaserineqarpoq.

## Pilatsereernerup kingorna katsorsartinneq

Pilatsereernerup kingorna illissap peerneqartup ilaanik mikroskopikkut misissuinermi takuneqarsinnaavoq, tinunerup illissap iigaanut qanoq ititigisumik inississimanera. Tamatuma saniatigut kræftip sananeqaataasa qanoq navianartigineri nalilerneqartarput.

Misissuinerit tunngavigalugit nappaatip gruppemut sorlermut inis-sinneqarnissaa nakorsaniit aalajangerneqartarpooq, kiisalu aamma takuneqarsinnaavoq pilatsinnermut ilassutigalugu nakorsasiinissaq qanoq pisariaqartiginersoq.

Nappaat gruppe 2-miippat, tassa navianannginneruppat imaappoq nangeqqinnissaq ilimanaateqannginnerusoq.

Illit nappaatit tassaniippat, taava nakorsarneqaqqinnissaq imaluunniit katsorsaaseeqqinnissaq neqeroorutigissallugu pisariaqassangilaq taamaallaalli piffissaq aalajangersimasoq qaangiukkaangat missorneqartassaatit. Illuatungaatigut nappaat navianarnermiippat tassa gruppe 1-imut inissinneqarsimappat taava qinngortartinnissamik neqeroorfingineqassaatit.

## **Qinngortaaneq**

Qinngortaanikkut kræftip sananeqaatai aserorneqartarput.

Qinngortaaneq namminermini annernannngilaq pinerillu tamaasa minutsialuinnguanlik sivisussuseqartarluni.

Nappaateqarninni navianartorsiornerusutut inissinneqarsimaguit taamalu pilatsissimaninnut ilassutigitillugu qinngortarneqartussanganngorsimaguit, naavit appasissortaatigut qinngortarneqartassaatit.

Qinngortaanerit sapaatit akunneranut tallimat, sapaatit akunnerini 5-6-ini ingerlanneqassapput, qinngortaanerit katillutik 25-it 28-illu akornanni amerlassusillit ilinnut atortinneqassapput.

Pilatsereernerpit kingorna kræftip sananeqaataanik suli peqarsimap- pat qinngortartinninni qinngornerit sakkortunerit atorneqassapput.

## **Qinngortaanerit pilatsinnertaqanngitsut**

Pilatsinnissat pisinnaasimannngippat taava imaratarsinnaavoq nap- paatikkut silataaniit aamma iluaniit qinngortaanerit ingerlanneqar- tut. Iluaniit qinngortaanerit pisarput torlulimmik illissannut man- gussinikkut taannalu iluaqutigalugu kræfteqarfik qaninnerpaallugu qinngortaasoqarsinnaavoq. Iluaniit qinngortaaneq assigiinngitsuti- gut ingerlanneqarsinnaasarpooq apeqqutaatillugu peqqissaavinni atortut suut atortinneqarnersut. Qinngortaanerit sakkukinnerit 5-6-it atortinneqarsinnaapput aammali qinngortaanerit sakkortu- nerit 2-3-t atortinneqarsinnaallutik. Pilatsinneqarani qinngortaanerit pilatsereernerup kingorna qinngortaanernut sanilliullutik sakkor- tunernik qinngorneqartinnejqartarput. Katsorsaatissatut taamaal- laat silataatigut qinngortaanerit atortinneqassappata taava qinngor- taanerit ikinnerpaamik 30-it atortinneqassapput taakkualu sapaatit akunneranut ataatsimut tallimariarluni sapaatit akunnerini 6-ni atortinneqassallutik.

## **Qinngortartinnerup kingunipilui**

Inuit qinngortartinnerminni assigiinngitsunik malussartarput. Ilaat malunnaatinik annikitsunnguanik atugaqarlutik inuunermikkullu allannguiteqartsinatik pisarput, ilaalli qasoqqanerusarput, timmilutik aamma merianngullutik. Kuutsikkut qinngortartinnermi aamma quup aqqaataatigut inalukkallu appasissortaatigut eqquaga-soqartapoq. Arnat amerlasuut quinerminni nakasummikkut qasilisoortarput ippigusuttarluillu. Tamanna arnat ilaanni ataavartuusarpoq. Aamma ilaanni quup aqqaataatigut aanaartitsisoqartarpoq.

Inalukkakkut ippinniuutit tassaanerusarput timminnerit immaqalu aattalimmik anartarnerit tamakkulu ilaanni ataavartuusinnaasarput. Kiisalu amerlasuut amii aappillersinnaasarput soorlu seqinertippalaarsimasutut amerlu ungilallunilu qalipaajarsinnaasarpoq.

Amerlanerpaat tamakkua qaangertarpaat ilaasali amii issutsittutut pisinnaasarput qalipaataallu taarsisinnaasarluni.

Amerlasuut utsuummikkut panertunngortarput ameraasaallu amerleqqajaasunngorsinnaalluni. Panernerit ajornartorsiutaappat tarngummik immikkut ittumik atugaqarsinnaavutit.

Pujortartartuuguit pilatsinnissat sioqqullugu pujortarunnaarnerit iluaqtigisinhaavat ippinniornissatit annikillisillugit.

Ippinniuutit tassaasinnaapput aseruuttoornerit, uummatikkut puakkullu ajornartorsiulerterit aamma ikit aanaalersinnaavoq mamisikku-minaalluni maminnerlussinnaallunilu. Pujortartut qinngortartinnerminni qinngortaanerit sunniutaat annikillisissinnaavaat.

Taamatorluinnaq imigassaq aalakoornartoq Peqqinnissakkut Aqutsisoqarfimmiit killigititaasunit qaangiiffinginkukku ippinniuutit annikillisissinnaavatit. Aalakoornartumik atuinerit annikillisikkukku ippinniuutigilersinnaasatit annikillisissinnaavatit.

## Nappaat siaruaassimappat qanoq pisoqassava?

Illissakkut kræfti timip sinneranut sumiiffinnut assigiinngitsunut siaruaassimappat taava nakorsaaserneqarnissannik neqeroorfingeqassaait. Tamanna imaassinggaavoq hormoninik nakorsaasiineq imaluunniit kemoterapi-imik nakorsaasiineq.

### Hormininik nakorsarneqarneq

Nappaat siaruaassimappat imaluunniit nangeqqippat taava hormoninik nakorsaasiineq eqqartorneqarsinnaavoq. Illissakkut kræfteqarnermi arnat timaasa hormoniliarisagaat østrogen sunniuteqarsinnaavoq. Imaappoq kræftip tinunera østrogeniliornerup annertusarsinnaavaa. Illuatungaatigulli arnat timaasa hormoniliaata aappaa progesteron (gestagen), iluaqtigalugu kræftip siaruaakkiaartornissa pinngitsoortinnejqarsinnaavoq. Tassa imaappoq hormoninik katsorsaasiinermi hormoni progesteron nakorsaatigitillugu nappaat ingalassimatinnejqarsinnaavoq.

Taamaaliornikkut iisartakkat atortinneqartarput.

### Hormoninik nakorsaasiinermi kingunipiluit

Hormoninik nakorsaasiinermi kingunipiluit nalinginnaanerpaasut tassaapput isummakkut oqimaassutsikkullu allannguiteqarnerit, timip immattoornera, meriannguneq aamma niaqorlunneq. Kiinnakkut naasoorsinnaavutit ivianngitillu manngersisinnaapput. Qaqutigut taqqakkut aseruuttoortoqarsinnaasarpooq.

## **Kemoterapii**

Kemoterapii tassaavoq inuup sananeqaataanik toqoraasinnaasumik nakorsaasiineq. Nappaatip pinartunngorsimanagerani imaluunniit nangeqqinermi nakorsat ilaanneeriarlutik kemoterapii nakorsaatissatut misiliutigisarpaat. Taamaattoq nakorsaat pisariunngitsoq pitsaasorlu napparsimasut tamarmik kinguneqartilluarsinnaasaat suli nassaarineqanngilaq.

Nanginnermi imaluunniit nappaatip suli atuunnerani kemoterapiimik nakorsaaserneqarneq nalinginnaasumik tassaavoq anniarnaveerssatitut atortitaq. Tamanna pillugu sukumiinerusumik kingusinnerusukkut atuagassaqassaaq. Kemoterapii taqqatigut aammut akuliunneqartarpoq taamaalillunilu timip sinneranut siaruaatsinnejartarluni. Kemoterapiit assigiinnigsut amerlasuuujupput.

Kemoterapiip atortinneqarnerata nalaani napparsimmavimmi uninanganissaq nalinginnaasumik pisariaqarneq ajorpoq.

## **Kemoterapiip kingunipilui**

Kemoterapiip atortinneqarnerata nalaani timi tamarmi sunnerneqartarpoq. Taamaattumik timip sananeqaatai kræfteqarfít kisimik sunnerneqarneq ajorput aammali sananeqaatit peqqissut sunnerneqartarput. Tamanna kingunipiloqartinnejarsinnaavoq taakkuli amerlanertigut qaangiuttarput.

Kingunipiluit nalinginnaanerpaat tassaapput perussussuseerunneq, qasoqqaneq, nererusussuseerunneq, timminneq, meriannguneq, meriarneq aamma nujaarunneq. Kemoterapiip sorliup atortinneqarnera kingunipilutsitsinermi allanngorarsinnaavoq.

## **Napparsimasunik sullisisut ilinnut katsorsaasut oqaloqatigikkit**

Illit nappaatinntut kemoterapii imaluunniit hormoni nakorsaasiunneqassatillugu kingunipiluit malunnaataat qanoq annikillisarneqnissaat pillugu ilinnut sullisisut saaffigisinnaavatit siunnersorneqaqqullutit ilitsersuunneqaqqullutilu.

# Allatigut katsorsaatissaqarpa?

## Misiliutaalluni nakorsaatissinneqarneq

Misiliutaalluni nakorsaateqarneq tassaavoq nakorsaatinik nutaanik misiliilluni ilisimatusaatigalugu misilittaaneq. Nakorsaatit misiliutaasut ilumut iluaqutaanerat suli uppernarsaatitaqanngillat.

Tamanna pisarpoq nakorsaatit pisortaniit akuerineqarnissaat sioqullugu, misiliutaasullu inuit immikkut akuersisimasut aalajangersimasumik amerlassuseqartarput.

Misiliutaalluni nakorsaaserneqarnissamut kikkut peqataanissaat pillugu immikkut aalajangersagaqanngilaq. Misiliutaanermi apeqqutatinneqartarpoq kræftip suunera, kræfteqarluni paasisaqaqqam-mersuuneq, imaluunniit katsorsarneqarluarnerup kingorna geqittoortuuneq. Aamma apeqqutaasarpooq tinunerup qanoq angitiginera imaluunniit siaruaassimanera. Kiisalu siusinnerusukkut katsorsartissimaneq apeqqutaaqataasarpooq.

Misiliutaasut tamarmik aalajangersimasumik pilersaarusrorfigineqartarput, soorlu qanoq sivisutigisumik misiliutaanissaq ilaallu ilanngulgugit.

## Misileraataasumik katsorsaaneq

Misileraatasumik katsorsaaneq tassaavoq siusinnerusukkut atorsi-managu kiisalu suli paasilluarneqanngitsoq ilumut katsorsaataa-sinnaanersoq, tassa kinguneqarluarsinnaaneranik uppernarsivin-neqanngitsumik misileraalluni katsorsaaneq.

Aalajangersimasumik maleruagassiiarneq qaqtigorsuaq pisarpoq, kiisalu misileraataasumik katsorsaasoqartarpoq allatigut soriusissa-runnermi.

Siuertaavoq toqquatasinnaasumik nappaatillit ataasiakkaat nap-paateqarnerini pitsaanerpaamik iliuseqarfingiinarneqarnerat.

Misileraataasumik katsorsaanerit pisarput, kræfteqartunut katsorsaavinni immikkorluinnaq pitsaassusilimmik qaffasissumillu ilisimatusarfiusuni. Kræftimik napparsimasut misileraataasumik katsorsa-gassatut Peqqinnissakkut Qullersaqarfimmut saaffiginnissutaasarpus innersuunneqartarlutillu. Misileraataasumik katsorsaaneq pillugu immikkut ilisimasallit suleqatigiisitat Peqqinnissamut Qullersaqarfimmut innersuussisarpus siunnersuisarlutillu.



**Periaatsit ilisimatusarnikkut akuerisaanngitsut atorlugit katsorsaaneq**  
Tamanna katsorsaariaaseq tassaavoq napparsimmavinni nakorsaniit nalinginnaasumik neqeroorutaaneq ajortoq.

Katsorsaatissatut immikkut akuerisaasut nakorsamiit itigartitsissuti-gineqarsinnaanngillat. Taamaattoq illit soorunami toqqarsinnaavat, katsorsartinnissat nakorsamiit neqeroorutaasoq ilassuteqarfagalugu periaatsit ilisimatusarnikkut akuerisaanngitsut atorlugit katsorsartinnissat. Taamaallaat eqqumaffigiinnassavat immikkut akuerisaanngitsut tassaammata ilisimatuussutsikkut misileraanertaqanngitsut, taamaattumillu sunniataat imaluunniit kingunipiloqarnersut erseqqisumik uppernarsaatitaqanngitsoq.

Immikkut akuerineqanngitsut nakorsaatiginiartakkat napparsim-mavinni katsorsaatinut nakorsaatigitinneqartunut sunniisinnaasunik aamma ilaqlarsinnaapput. Taamaattumik katsorsartinnerit tamak-kuninnga ilalissagukku tamanna pillugu nakorsaq oqaloqatigissal-lugu pingaaruteqarpoq.

## Katsorsartinneq naammassippat qanoq pisoqassava?

Katsorsartinnerit naammassippat nukissaqanngitsutut qasoqqasutullu misigiguit tamanna nalinginnaalluinnarpoq.

Katsorsartissimasut ilaat amerlasuut kingunipilutsitsisarput ataavar-sinnaasunik tamannalu sungiunniartariaqartarpooq.

Amerlasuut iluaqtigisarpaat kræfteqarsimasunut siunnersuisarfegarpat taakkua atorluarnissaat.

### Misissortinneq

Nappaatit navianarnertut inissinneqarsimanngippat taava neqe-rooffigineqassaatit ukiuni tallimani piffissaq aalajangersimasoq qaangiukkaangat katsorsarneqarfinniit arnat nappaataat pillugit immikkut ilisimasalinniit misissorneqartarnissannik.

Qinngortarneqarsimaguit, tassa nappaatit navianarnertut inissinneqarsimappat taava qinngortarneqarfinniit aamma taamatorluin-naq nakkutigineqassaatit misissorneqartarlutit ikinnerpaamik ukiuni tallimani. Misissuinerni apeqqutaatinneqartarpooq peqqissarne-qarnermi qanoq ingerlasimaneq.

Misissuinermi ilukkut misissorneqartassaatit, kiisalu ilunniit misissu-gassamik piigaqartoqartassaaq. Taamaattoq qinngortarneqarsima-guit nakorsat amerlanerpaatigut misissugassamik ilanngaaneq ajor-put qinngortarneqarnerup misissugassat sunnertarmagit.

Nangeqqittoqarsimaneranik minnerpaannguakkulluunniit pasitsaasa-qartoqarpat taava misissuinert allat pissapput tassaasut as-siliinerit ultralydsscanning aamma CTscanning - kiisalu mikroskopikkut misissugassamik piigaqartoqassaaq. Minnerpaannguakkut pasitsaassaqarneq imaanngilaq nangeqqinneq qulakkeerneqartoq imaaapporli sukumiisumik misissuisoqartoq qulakkeerin-nikkumalluni. Arnat amerlasuut katsorsartereerner-mik kingornagut iluminniit aanaalersarsinnaapput. Tamanna pissuteqarpoq ilumi taqaqqat annertusisarnerannik.

## Nappaatip nangeqqinnissaanut ersissuteqarneq

Katsorsartinnerpit kingorna ilisimasariaqarpat, illit ilinnullu at-tuumassuteqartut siornatigutut inuunerisimasamut, soorlumi pisoo-qarsimangitsutut pissuseqarlusi inuunersi nangeqqikkissi, taman-nami ajornakusuussaqaq. Nappaateqarsimasut amerlaqisut nappaatip nangeqqinnissaanut annilaangatuunngortarput timimilu pisut assut eqqumaffigilersarlugit.

Aamma illit taamatorluinnaq misiguit, ilinnut iluaquataasinnaavoq ernummatitit pillugit nakorsat oqaloqatigigukku. Allat ilittut nappaateqarsimasut aamma misigisaat pillugit oqaloqateqartarsinnaas-saatit, soorlu sumiiffinni ikorfartoqatigiinnik aallartitsisoqarsimap-pat.

## Peqqisseqqissaanga?

Kræftimik nappaateqalersimagaanni tamanna amerlasuunit tuparu-jussuassutaasarpooq. Amerlasuuni eqqarsaat siulleq tassaasarpooq:

Toqussaanga? Illissakkut kræfteqarneq nappaataavoq pinartuusoq taamaattumillu peqqisseqqinnissamut apeqqutaasut pingarnerit ilagaat kræftip paasineqajaarsimanera katsorsaanerup tuavius-saanera kiisalu kræfteqarfiup tamarmi peerneqarsinnaasimanera.

Tullinnguullugit atuarneqarsinnaapput Danmarkimi naatsorsueq-qissaarnerup kingorna paasisat qanoq ittuunersut.

Taakkua takussutaasinnaapput illissakkut kræfteqarlutik katsor-sarneqartut aamma peqqisseqqittut qanoq amerlatiginersut.

Pingaruteqarpoq paassisallugu naatsorsueqqissaarnerit illerpiaq nappaateqarninnut tunngatillugu takussutaasinnaanngimmata.

## Naatsorsueqqissaarnerit qanoq takussutisaqarpat?

Naatsorsueqqissaarnermi inuit amerlasuut immikkoortiterneqarneranni inuit ataasiakkaat qanoq atugaqarnerinut attuumassute-qanngillat. Illit peqqisseqqissinnaaninnut apeqquataasut tassaapput nappaativit qanoq killifeqarsimanera, qanoq ukioqarnerit, allatigut nappaateqarnersutit, qanoq inooriaaseqarnersutit aamma timikkut qanoq piginnaasaqartiginerit.

Nakorsat aperisinnaavat illit peqqisseqqissinnaanerit akisinnanaeraa. Taamaattoq ilimagissangnilat nakorsap qularnaarinnilluni akissute-qarnissaa.

Arnat illissamikkut kræfteqartut navianartorsiunnginnerusutut nalilerneqarsimasut amerlanerpaartaat, tassa 90 pct.-ii nappaatip paasineqarneraniit ukiuni tallimani imaluunniit sivisunerusumi inuusarput. Arnat illissamikkut kræfteqalersimasut nappaatimik paasereernerata kingorna agguaqatigiisillugu 70 pct.-ii ukiuni tallimani imaluunniit sivisunerusumi inuusarput. Taamaattumik nappaataarussimallutik peqqisisimasutut isigineqartarput.

Peqqisseqqinnissamut apeqquataasoq annerpaaq tassaavoq nappaatip qanoq siaruaassimatiginera.

Kiisalu aamma nappaat navianarnertut inissisimagaluartoq aamma tassani peqqisseqqittoqartarsinnaavoq. Arnat illissamikkut kræfteqartut siaruaattoorsimangitsullu 80 pct.-ii peqqissareernermikkut ukiuni tallimani imaluunniit sivisunerusumi inuusarput. Kræftilli tinunera illissap iigaata avataanut imaluunniit illissap paavanut siaruaassimappat, arnat 70 pct.-iinik ikinnerusut ukiuni tallimani sivisunerusumiluunniit inuusarput.

## Kræfti peerneqarsinnaanngippat taava?

Illissakkut kræfti tamatigorluinnaq peerneqarsinnaaneq ajorpoq. Taamaattoqartillugu nakorsaniit neqeroorutigineqartarpoq anniaateqarnaveersaartitsiniarluni nakorsaasiineq.

Anniaateqartitsinaveersaarluni nakorsaasiineq nalinginnaasumik peqqissivissutaaneq ajorpoq, taamaattoq inuuneq sivitsorneqarsinnaavoq kiisalu inuuneq pitsaanerulersinnaavoq. Tamanna isumaqarpoq aaqqissinnaanngitsumik kræfteqartuulluni inuuneq atotariaqartoq.

Naatsorsueqqissaarnerit qanoq takussutissaqarpat?

## Anniaateqartitsinaveersaarluni nakorsaasiineq

Nappaatip siaruassimanerani imaluunniit nangeqqissimanerani kemoterapii annerisaqarnaveersaatitut atortissallugu periarfissaavooq.

Taamatut killiffeqarnermi kemoterapii peqqissivinnermik kingunesqarsinnaanngikkaluartoq, taamaattoq anniaateqartuunermut annikillisaataasarpooq imaluunniit anniarunnaavinnissamik kinguneqarsinnaavoq. Tamatuma saniatigut nappaat ersigunnaavissinnaavoq piffissap ilaani taamalu inuuneq sivisunerusinnaalluni.

Kemoterapii timimut nukillaarsaasarmat atortinneqarnerani, nakorsaniiat ataavartumik nalilersorneqartuassaaq ilinnut iluaqutaanersoq. Taamaattumik kemoterapii atulersinnagu misissortinnerit arlallit aqquasaartarsinnaavatit soorlu tarrarsuineq, CT-scanning.

Misissorttarerit qaammatit marluk pingasulluunniit qaangiukkaangata ingerlanneqartassapput. Taamaaliorternikkut nalilerniarneqartarpooq kemoterapiip atortinneqarneranut siunertaq, tassalu anniaateqartitsinaveersaarneq ilumut piviusunngortinnejarsimandersoq. Taamatuttaaq kingunipiluit qanoq annertutiginerat misisorseqartarpooq.

## Nanginnermi katsorsartinneq

Illissakkut kræfteqartut peqqissareernerup kingorna nangeqqittut amerlanersaat ukiut marluk ingerlanerini nangeqqittarnerat nalinginnaavoq. Nangeqqinnersmi illissap peerneqarsimasup inissisimaffigisimasaani nappaat inissisimagajunnerusarpooq.

Nangeqqissimanermut ilisarnaataasoq nalinginnaaanerpaaq tassavooq aaqalerneq.

Nappaatit nangeqqissimappat taava ilinnut nakorsaataasussaq pil-lugu aalajangiisoqarnissaanut apeqqutaatinneqassaaq siusinnerusukkut suna nakorsaat atorsimanerit. Siusinnerusukkut qinngortartissimannngikkuit qinngortaaneq atortinneqarsinnaavoq.

Aammali hormonitorneq imaluunniit kemoterapii atortinneqarsinnaavoq.

## Atoqatigiinnikkummi inuunera taava qanoq?

Illissakkut kræfteqarnermut katsorsartereernerup kingorna ilup al-languutaanut sungiussiniarneq sivisusarpoq. Arnat ilai allannguitut sungiussisinnaanngingajalluinnartarpuit.

Pilatsereernerup kingorna atoqatigiinnermi anniartarsinnaavutit kiisalu ilunni ameraaasap saalisimanera pillugu aanaalersinnaallutit.

Utsuukkut panerneq arnani aaqartarunnaartuni ajornartorsiutaavoq nalinginnaasoq. Tamanna akiorniarlugu hormiliuummik utsuunnut mangussisoqartarsinnaavoq. Aammali tarnutit assigiinngitsut per-rasaatitut atorneqarsinnaapput.

### Atoqatigiinnissamut kajumissuseqannginneq

Pilatsereernerup kingorna arnat amerlasuut misigisarpaat arnaassut-siminnik annaasaqarsimallutik aamma pilerigineqannginnerusutut misigisinnaapput kiisalu imminnut tatiginerat taamatuttaaq ato-qatiginnikkusunnerat amigaataalersarpoq.

Arnat appaat aamma kajumissuseerussinnaasarpoq anniartitsinis-sarlu ersissutigineqartarluni. Atoqatigiinnissamut kajumissusee-runneq ataavartunngorsimappat, tamanna pillugu nakorsaq oqalo-qatigineqarsinnaavoq imaluunnniit aappariit akornanni atoqatigiin-nikkut atugaqarnermut immikkut ilisimasalimmik ikiortissarsior-toqarsinnaavoq.



Atoqatigiinnikkummi inuunera taava qanoq?

## Sooq illissakkut kræfteqalersoqartarpa?

Arnat illissamikkut kræfteqalersut amerlanerpaartai 60-it missaani ukioqartuusarput. Suna pissutaalluni kræfteqalersoqartarnersoq ilisimaqqissaarneqanngilaq. Taamaattoq pissutaasinnaasut arlallit taakkartorneqartarput. Soorlu arnat horminiat østrogen ilaatigut pissutaasinnaasutut tikkuarneqartarpoq. Timi ukiuni amerlasuuni østrogenimik ataavartumik akoqarpallaarsimappat, illissakkut kræfteqalersinnaaneq qanillisinneqarsinnaavoq. Pisutaasinnaasut allat makkua aamma taaneqarsinnaapput:

- Pualavallaarneq
- Meeraqanngitsuuneq, pingaartumik kissaatigisaraluamik meeqqisinnaannginneq
- Arnap hormonitortinneqarnerani østrogen-imik annertual-laamik atortitsineq, pingaartumik hormonip aappaanik progesteron-imik akoqartitsinani østrogenitortitsivallaarneq
- Aaqartaliaarneq kiisalu kingusippallaartukkut aaqartarun-naarneq
- Sukkortuuneq
- Aap naqtsinerata qaffasippallaarnera

Arnat aaqartarunnaarnerisa nalaanni hormonitortitsinermi arnap kræfteqalernissaanut qanillisaanerusoqarneq ajorpoq, hormoni østrogen tunniunneqartartoq progesteron-imik akoqartarmat.

### Pualasuujuuneq

Pualasuujunermi illissakkut kræfteqalernissaq qanillisarneqartarpoq. Oqimaalliaartornermi kræfteqalernissamut qanittuuneq annertusi-sinneqartarpoq.

Tamanna pissuteqarpoq hormoni østrogen orsumiit pilersinneqartarmat. Arnap hormoniliornerani oqimaqaqtigiissoqannginneruppat taava sananeqaatit amerliaartornerat ilutigalugu illissap ajoquteqaler-sinnissaa qanillisarneqartarpoq, tamannalu piffissap ingerlanerani kræfteqalernermik kinguneqarsinnaavoq.

Arnat pualasuujuusut arnaniit pualangngitsuniit marloriaammik pingasoriaammilluunniit kræfteqalernissaminnut qaninnerusarput. Arnat pualasuut taamatut kræfteqalernissaminnut qanittuunerat aamma aaqartarnerup nalaani kingornanilu assigiimmik atuuppoq.

## Uanga nammineq qanoq iliuuseqarsinnaavunga?

Kræfteqartut amerlasuut soqtigisarilluinnartuuusarpaat namminneq qanoq iliuuseqarsinnaanertik. Nerisat, timikkut eqiingassuseq, tupatorneq aamma imigassamik aalakoornartorneq qanoq iliuuseqarfigissallugit pingaaruteqarpoq.

### Nerisat timikkullu iliuuseqarsinnaaneq

Kræftimik nappaateqartut amerlasuutigut sanigortarpuit.

Amerlasuut piffissap ilaani nererusussuseqarneq ajorput, merianngusarput, iisiuminaatsitsisarput allatigullu erlavikkut ippinniueterqarnerusarlutik. Nerisaat inuit nappaateqanngitsut nerisaannut sanilliullutik inuussutissartaqarnerusussaapput - soorlu nerisassat orsortaqaarnerit proteinertaqarnerillu nerisartussaavaat. Nakorsaq imaluunniit peqqissaasoq tamanna pillugu paasiniaaffiguuk siunnersorneqarnissat pillugu. Aamma inuussutissartorneq pillugu imikkut ilisimasalik ikuussinnaavoq.

Peqqissarnissaq sioqqullugu kingoqqullugulu timersornikkut iliuuseqartarnissaq amerlasuut iluaqutigisaqaat, timikkut iliuuseqartanneq iluarusunnartutut misinnartarmat aamma isummakkut pitsasumik kinguneqartarmat. Nakorsaq oqaloqatiguuk qanoq iliorsinnaanerluit aammali qanoq iliorsinnaannginnerlutit paasiniarlugu.

Uanga nammineq qanoq iliuuseqarsinnaavunga?


## Pujortartarpit?

Illissakkut kræfteqaruit pujortartarlillu taava pujortarunnaarnissat isumassarsiatsialajuvoq. Pujortartarnerpit katsorsartinnerit sunniuteqarfingisinnavaa, pilatsinnikkut qinngortartinnikkullu pujortartuuneq akornusersuisinnaammatt. Pilatsissimaguit ikitit mamisarumi-naatsuunerussapput pujortarnerup kinguneranik. Tassa imaappoq katsorsartinnerpit nalaani napparsimmavimmi uninnganerit pujortartuunerit pissutigalugu sivitsorsarneqarsinnaavoq.

Tupatortunngitsuni timi mamaarnerusarpoq. Peqqinnissakkut Qul-lersaqarfimmit innersuussutigineqarpoq pilatsinnissaq sioqqullugu sapaatit akunnerini 6-8-ni pujortarunnaareersimanissaq.

Pilatsereernerup kingorna sapaatit akunnerini 8-12-ini pujortanginnissaq innersuussutigineqartarpoq imaluunniit pujortaleqinqin-ginnissaq pitsaancerpaasarpoq. Pujortakkat annikillisarlugit iluaqua-taanngilaq. Tupatunngivinnissaq pisariaqarpoq.

Qinngortarneqarnermi qinngortaanerup sunniuteqartinnissaa tupa-tortuni annikillisinneqartarpoq.



## Pujortarunnaarnissamut ikiorneqarusuppit?

Pujortarunnaarniarneq assut ajornakusoorsinnaavoq. Pingaartumik napparsimanerup nalaani ajornakusoorsinnaavoq. Peqqinnissaqarfitt amerlasuut kommunillu allaffii pujortarunnaarnissaq pillugu siunnersuisinnaapput. Taamaattumik nakorsat peqqissaasullu, kiisalu kommunit allaffii sumiiffimmiittut saaffigineqarsinnaapput aperaluni pujortarunnaarusuttunut qanoq periarfissaqarnersoq.

Tamatuma saniatigut Paarisa piffissap ilaani pujortarunnaarnissamik ilitsersuisarpoq. Tamanna pillugu aamma peqqinnissaqarfimmi sulisut aperineqarsinnaapput.

Taamaattoq aamma qallunaatut paasisartunut internet-ikkut saaffiginnittooqarsinnaavoq uunga: Kræftens Bekæmpelse i Danmark. Nittartagaq una alakkarterlugu: [www.cancer.dk/tobak](http://www.cancer.dk/tobak)

## Aalakoornartutorpallaarpit?

Inuit imigassamik aalakoornartumik killigititaasuniit sinniillutik atuisut pilattartittussaasullu pilattartereernerminni eqqugaanerusarput, soorlu ikikkut aseruuttoornernik, uummatikkut puakkullu peqqiiliornermik kiisalu ikikkut aanaartitsinernik ikillu mamikkumaataarnerannik. Aalakoornartutortut aalakoornartutorneq ajortunut saniliullutik napparsimmavinni uninnganerat sivisunerusarpoq.

Katsorsarneqareernerup kingorna innersuussutaasarpoq aalakoornartutussagaanni tamanna killilersimaarniartariaqartoq, soorlu kiligititaasut qaangernagit aalakoornartutortoqartassasoq.

## Aalakoornartutorerup allanngortinnissaanut ikiorneqarusuppit?

Nappaatit pillugu suliaritinnissat sioqqullugu aalakoornartutorerit annikillisarniarlugu nakorsat imaluunniit napparsimmavimmi sulisut siunnersortigisinnaavatit. Kiisalu sumiiffinni pitsaaliuinermik siunnersorteqarfiusuni sullisisut aalakoornartumillu ajornartorsiu-teqartut pillugit siunnersuisinnaasut saaffigisinnaavatit.

Peqqinnissamut Qullersaqarfiup imigassamut aalakoornartumut killigitai

- Arnanut immiaaqqap ataatsip aalakoornartuata nalinga uuttuitigalugu, sapaatit akunnerinut ataatsimut 14-it sinnernissaat inassutigineqanngilaq
- Angutinut immiaaqqap ataatsip aalakoornartuata nalinga uuttuitigalugu, sapaatit akunnerinut ataatsimut 21-it sinnerneqarnissaat inassutigineqanngilaq
- Amerlanerpaamik tallimat sinnerlugit imernissaat innersuussutigineqanngilaq

## Aalakoornartutorerup allanngortinnissaanut ikiorneqarusuppit?

Nappaatit pillugu suliaritinnissat sioqqullugu aalakoornartutorerit annikillisarniarlugu nakorsat imaluunniit napparsimmavimmi sulisut siunnersortigisinnaavatit. Kiisalu sumiiffinni pitsaaliuinermik siunnersorteqarfiusuni sullisisut aalakoornartumillu ajornartorsiu-teqartut pillugit siunnersuisinnaasut saaffigisinnaavatit.

## **Sumi ikiorneqarsinnaavunga imaluunniit siunnersorneqarsinnaavunga?**

Kræftimut akiuiniarluni suliniaqatigiiffik, Neriuffik Kalaallit Nunaanni sumiiffinni amerlasuuni immikkoortortaqartaqarfeqarpoq. Ilinnut qaninnerpaaq sumiinnersoq qanorlu saaffigineqarsinnaanersoq pillugu napparsimmavimi sulisunut nakorsamullu paasiniarsinnavat. Imaluunniit Neriuffiup Kattuffia Nuummiittooq saaffigisinnaavat uunga:

Neriuffit Kattuffiat  
Postboks 1546  
Aqqusinersuaq 48  
3900 Nuuk  
Tlf. +299 49 04 89 Fax: +299 31 25 04  
E-mail: [neriuffik@greennet.gl](mailto:neriuffik@greennet.gl)  
Internetikut nittartagaq: [www.neriuffik.gl](http://www.neriuffik.gl)

Saqquimmersitsisoq:  
Neriuffit Katuffiat - 2010 Ilusaa siulleq, naqiternera siulleq  
Ilusilersuisoq: inuk Media ApS · Assit © inuk Media ApS, Johanne Olsen  
Quppersakkamit uuminnga nutsigaq: 'Kræft i livmoderen'  
Nutserisoq: Kirstine Berthelsen



**Neriuffit Kattuffiat**  
Postboks 1546,  
Aqqusinersuaq 48 A,  
3900 Nuuk  
[neriuffik@greennet.gl](mailto:neriuffik@greennet.gl)  
[www.neriuffik.gl](http://www.neriuffik.gl)

